


行素州堂金石叢書


1004/13  
古.04/899  
部 = 13





金石錄補

爾珍署





光緒丁亥孟秋  
行素州堂藏板

金石錄補序

婁江錢 嘏撰

古人事蹟以金石傳者不可勝數而後世不可概見大都爲風雨之所剝蝕兵燹之所摧殘而又無博雅好古之士蒐討而記存之故愈久而愈亡也今歲暮春葉子九來偕王子宛仲過湖南毛斧季汲古閣觀列代名人碑碣斧季盡出其藏弁相與摩挲展玩者久之九來因以其所著金石錄補見示屬予爲序予觀趙德甫金石錄上自三代下訖隋唐五季去取褒貶極一時之盛但丁靖康流離播遷其間援据論正有疑誤遺脫讀者不能無憾焉斧季嘗欲博採舊聞網羅散佚斷以德甫以



金石錄補序  
上爲一書曰補金石錄宋元以下爲一書曰續金石錄  
今九來所著不謀而同宜其相見之樂相得之深也然  
則德甫之後又有德甫其有功于學者豈曰小補之哉  
雖然九來著述甚富名滿詞壇顧不屑屑于當世之文  
章而獨上下千古之陳迹因其人論其世有不勝感慨  
于治亂興衰之故豈直是正得失討論譌謬于殘章斷  
畫之間而已邪書此以復九來其必以予爲知言也

金石錄補自序

崑山葉奕苞九來



天下之物不朽者莫如金石而冰霜凌之風雨蝕之山  
積川決以滅之下至樵夫牧豎摩挲淪毀大兵大役侵  
劫之餘幸而存者益少矣而趙德甫氏錄至二千卷何  
其富也趙氏以爲訪求藏蓄凡二十年豐碑巨刻殘章  
斷畫殆無遺矣而天下有不盡然者人之耳目易窮物  
之顯晦有數也先文莊磨旌所至輒下令收金石刻文  
積千餘軸悉已散去家君宦游兩都時效德甫之所爲  
又廢于乙丙間余少喜臨池得墨碑百本審其拓偃之  
勢而知師承所自妄欲搜訪隱僻以補趙氏之遺王子



宛仲出其所藏二十種予舊蓄廿餘種皆漢唐舊碣爲  
趙氏所未錄者仿其例作辨正跋語以誌一時之見嗣  
是有得卽續書之自媿好而無力不克廣羅博覽以資  
異聞竊意遠近之士有愛我者當不異王子出其所藏  
以相示使幸存之物不至于終亡也例八則附後

古人首重碑額必擇名手書之近時搨本輒遺其額  
予跋首及焉無額則書題以冠之

書撰人不錄官秩則于建碑年月處有戾蓋歲月後  
先轉除亦異全載以備參考

鐫字人尤重如元省已伏靈芝黃仙鶴之類皆李北海  
手刻而託之也顏魯公書碑必使家僮模刻而米

元章猶謂顏碑多失真故予并錄鐫字人姓名

漢碑自隸釋後遺者絕少予所錄不止補趙且以補  
洪三國六朝亦無幾姑俟博訪


唐碑佛家最多而雜且非正史所載考訂殊難  
宋刻張旭懷素等帖雖非唐搨猶爲舊勒存之

古人墨蹟流傳最著者漸多刻本兵火之餘急宜收  
錄予先拔其尤以附後

漢碑絕少如孔子四十七代孫中散公傳于宋紹興  
甲寅著東家雜記時則司空孔扶太守孔宏御史孔  
翊從事孔君德諸碑尙存而洪文惠公隸釋云俱未  
之見至予謁孔林訪孔彪碑尙埋土中三尺況前碑



乎恐諸碑名將不存故錄入目中餘仿此



金石錄補題辭


嘗覽李易安所作金石錄後序爲之掩卷太息夫以趙明誠好古之篤採輯之勤所得金石文如此而當其身散逸已甚明誠卽世遽遭亂離十不存一然則古人手跡其流傳後世不消滅者不亦難哉古人有言一法弊則立一法以救之孔子曰其人存則其政舉昔賢之美未有久而不湮者湮而未盡之時天又必生賢人焉爲之補救而接續之以使不墜此豈獨於帝王之大經大法世治世亂之所係卽好學稽古之事亦莫不然余生僻縣淺見狹聞又性鈍不能博涉古人書籍所睹趙氏金石錄後僅得見橋李曹侍郎金石表曾屬予爲之敘



今再見崑山葉子九來之金石錄補遺九來先祖父文  
莊公性嗜古廣搜至千餘軸遭亂廢失其先君水部公  
宦遊所至又輒輯之乙酉丙戌又廢九來少喜臨池慨  
然思繼祖父之學求得墨碑百本漸欲搜訪以補趙氏  
之遺所謂湮而未盡必有人焉爲之補救而接續者非  
歟九來勤學好古有名當時前年舉博學宏詞以當路  
敦迫就道旣報罷益自喜歸而搜訪古人名跡益勤夫  
以九來之才又其親從兄弟方貴顯清華爲文章宗主  
而九來卒報罷屈首窗几孜孜然思補古人之缺則九  
來之爲人可知彼其意固有在此而不在彼者耶予與  
九來交九年庚申秋就醫于吳門九來棹舟訪予者數

反出示此書起夏禹衡山碑終宋周處廟像記凡若干  
種皆漢唐舊碣爲趙氏所未錄者仍仿其例作辯正跋  
之語皆簡古有風味足與古金石稱遂援筆題其首寧  
都同學弟魏禧撰





金石錄補卷第一

跋尾

槐廬叢書

崑山葉奕苞九來著

吳縣朱記榮校刊

古器物銘第一

夏鐘銘

商鐘銘

古器物銘第二

商父乙鼎銘

商爵銘

古器物銘第三

周南仲鼎銘

周師旦鼎銘

古器物銘第四

秦平陽尺銘

漢器銘

漢元嘉力銘

古器物銘第五

漢延光壺銘

漢啓封鑑銘

古器物銘第六

漢儀尊象尊銘

漢雷尊銘

古器物銘第七

漢銅虎符銘

新莽權銘

古器物銘第八

晉尺銘

晉銅參槃銘

古器物銘第一

趙氏模本

秦氏模本



夏商鐘銘

右夏鐘一商鐘二大禹以九牧之金鑄鼎及他器物皆  
鈿紫金爲文庾肩吾所謂鵠首仰立蛟腳旁舒者是也  
鐘之上六字下兩旁各二字商鐘祇一鹿字象形松雪  
云舒州太湖縣取土得之歸王崧壽茂家又一鐘曰父  
作旅旅衆也非一鐘可知說文云鐘樂器也呂氏春秋  
黃帝命伶倫作十二器考工記鳧氏爲鐘故六律以鐘  
名之予謁曲阜至聖廟適遇秋丁見奠獻時所陳樂器  
其中古鐘高尺餘與三鐘相類而夏鐘口銜雙龍商鐘  
迴文周徧刻鏤精巧殆非後世可及

古器物銘第二

商父乙鼎銘

右鼎藏吾邑李氏相傳爲文王鼎予手摹其文共二行  
九字云口山口作父乙寶尊彝第一第三字不可識墨  
子曰夏禹制鼎四足而方此彝兩耳四足其制同鼎而  
曰彝蓋如考古錄父癸方彝之類祖丁父己薛尙功皆  
名爲商器則此非周鼎可知吳燕上二字未詳

商爵銘

右六爵父丁三己辛癸各一皆趙子昂氏松雪齋拓本  
薛尙功釋祖己父乙爵謂商之成湯雍己廟中祭器以  
見其孫與子之作竊意商雖尙質無子孫直呼祖父之  
名刻于禮器而相傳已久終失其解則以爲商之器而



古器物銘第三

周南仲鼎銘

右銘鼎在鎮江府焦山寺中高一尺三寸腹徑一尺五寸八分口徑一尺四寸五分耳高三寸闊四寸二分足六寸一分深八寸二分銘九十三字其文曰惟九月既望甲戌王如于周丙子烝于圖室司徒南仲佑世惠僉立中庭又曰世惠敢對揚天子丕顯敬休云云按薛尚功釋毛伯敦銘位爲立而楊氏謂古立位同用周禮小宗伯掌神位註位作立鄭司農云立讀爲位又古文尙書公卽位爲卽立則是銘亦當作位揚州程穆倩從薛

氏讀爲立吾邑顧寧人金石文字記引嘉興朱錫鬯跋曰鼎銘其人莫考戊午秋予適京師登焦山摩挲鼎側拓其銘詞後遇錫鬯于阮亭王先生邸中謂之曰銘中有司徒南仲卽其人也曷云莫考況銘之末云用作尊鼎用享于烈考萬年子孫永寶用此必司徒家廟之器無疑蓋禮部之兄吏部子底從焦山拓歸俾穆倩讀之可識者七十有八字存疑者八字不可識者七字吏部賦長歌禮部和焉以是傳聞于世錫鬯又云古之勲在王室者旣受之冊歸必銘其器論撰其祖父之德善功烈以示後世與予意合直可名爲南仲鼎也又云詩書所載僅千百之一而銘諸器者無窮自秦銷金咸陽爲



歐冶改煎不可勝數世徒知秦燔書之禍不知銷金之禍最烈也錫鬯善讀書尤好金石文字足跡所至于荒山窮谷中訪得一碑必發土出而搨之知予有同好多所資益云

周師旦鼎銘

右周師旦鼎旦周公也營洛遷殷之後召公爲太保見于尚書而史記則云召公爲保周公爲師鼎銘云惟王元年八月丁亥師旦受命作周王太妣寶尊彝蓋文王廟中祭器也文王于公爲考他鼎有文考文母之稱而此云周王太妣者公受命造鼎不敢自致其子道之所宜稱也武王追王太王以後文考得稱王冠之曰周不特于家人有嚴君之義亦以別于魯之廟也夫

古器物銘第四

秦平陽尺銘

右銘詞所與薛尚功所錄秦權銘不同者七字後題云平陽尺長谷山人徐獻忠金石文以爲權而予直定之爲尺按周制寸尺咫尋常仞諸度量說苑云度量衡以粟生之十粟爲一分十分爲一寸十寸爲一尺此平陽較量法度所用之尺也平陽在河東杜預曰衛地也平陽東南地名馬陵左傳曰成七年諸侯盟馬陵又云在魏郡元城堯始都晉陽後遷河東平陽卽其地漢有平陽侯國蓋此尺在平陽如趙錄金銅鉦藏于平周之說



是也

漢器銘

右銘云五年三月廿日造七字而其器不詳自漢武帝建元紀元以後凡器物無不用當時年號者此必建元以前之物故止稱五年也字畫精妙用以冠漢諸器云

漢元嘉刀銘

右刀銘云元嘉三年五月丙午日造此關一官刀長關

字尺二關三宜侯王大吉祥范史輿服志佩刀諸侯王

黃金錯環挾牛鮫黑室意即古之容刀也公劉詩鞞琫容刀朱註容飾之刀毛傳云言有武事也范書注引鄭箋既爵命賞賜而加賜容刀有飾顯其能制斷也春秋

繁露云佩劍在左青龍之象刀之在右白虎之象劉昭補注以為自天子至庶人皆佩劍故蕭何履劍上殿而此志止言刀為未備觀是銘曰造此官刀復有宜侯王大吉祥之祝似漢世重賜刀故范氏獨著于篇歟按列傳虞延馮石應奉馬嚴鄧遵皆有佩刀之賜至唐貞觀中猶沿其制賜房元齡魏徵是也虞喜志林云古人鑄刀以五月丙午取純火精以協其數其本諸此歟春秋繁露云羊之為言祥也此羊字作祥解

漢延光壺銘

右壺銘云延光四年銅二百觔直錢萬二千隸書朱文字左行按昆吾紂臣作瓦器為壺說文云壺昆吾園器



也禮記禮器門內壺君尊瓦甒註壺大石瓦甒五斗周禮涿壺氏掌除水蟲註壺爲瓦鼓涿擊之而疏又云是盛酒之器故周禮司尊彝有壺尊左傳昭十年尊以魯壺又投壺註頸脩七寸腹脩五寸徑脩一寸半容斗五升喪大記狄人出壺乃漏水之器則壺者其用非一初爲瓦器未知何時始範以銅也此壺用銅二百斤所容必大疑非祭祀盛酒之具薛氏商弓壺註壺酒之下尊也尊而居下則其所容或越于鼎彝之外視古瓦甒五斗未可知

漢啟封鐙銘

右鐙銘云啟封一斤十二兩十二銖容一斗小篆之上

品歐陽公得蓮勺宮壚林華觀鐙爲漢書所不載而此鐙曰啟封亦無可考未知趙文敏何據乃題爲漢鐙也銘傳字佳不忍棄錄之

古器物銘第五

漢犧尊象尊銘

右犧尊象尊在曲阜夫子廟大成殿案上全作犧象形而背上負尊旁各有字云孔子廟祭器漢元和二年造韓敕造廟禮器碑有雷洗觴觚爵鹿俎榘籩柶禁壺之物無不載而不及尊豈非兩尊完好不待更造邪說文云尊酒器也周禮小宗伯六尊註犧尊象尊著尊壺尊太尊山尊以待祭祀賓客之禮周官司尊彝春祠夏禴



其再獻用兩象尊是也魯頌閟宮詩犧尊將將毛傳云  
犧尊有莎飾也正義阮諶禮圖云犧尊飾以牛象尊飾  
以象于尊腹之上畫爲牛象之形卽毛傳所謂飾也朱  
子註云尊爲牛形鑿其背以受酒而王肅劉沔云魏太  
和中魯郡發地得齊大夫子尾送女器有犧尊直以犧  
牛爲尊然則象尊爲象形可知已禮器云廟堂之上壘  
尊在阼犧尊在西君西酌犧象夫人東酌壘尊皆器之  
貴重者也故孔子曰犧象不出門蓋古人制器必尙象  
此全仿犧象之形之謂也明堂位曰犧象周尊也而薛  
氏商器款識有象尊頭目尾足皆具銘一字曰象則周  
以前固有之矣予同雲南雷公子玉衡謁廟下雷語予  
云大成殿象尊兩牙具八音予疑其謬試之左清右濁  
果然命搨碑人張太和摹此數字如右

漢雷尊銘

右尊在曲阜大成殿案上犧象兩尊之中銘文十一字  
同其文陽其篆古餘作雲雷回互之形梁孝王傳有壘  
尊注鄭司農云上蓋刻爲山雲雷之象按漢祭器有山  
壘馬融廣成頌山壘常滿宋沈括云銅壘之飾皆古雲  
雷字相閒博古圖壘閒錯雲雷舊圖無雷止畫雲氣爲  
近是

古器物銘第六

漢銅虎符銘



右朔方太守右第三銅虎符銀錯小篆極類秦碑藏關中郭允伯家

新莽權銘

右權銘曰律權石重四鈞同律度量衡有新氏造按漢志三十斤爲鈞四鈞爲石爲斤一百二十故謂之權石莽號新室權銘晉末校尉王和掘得園石其銘如是蓋同時所造也

古器物銘第七

晉尺銘

右尺背銘云周尺漢志鐳欽銅尺後漢建關一銅尺晉前尺竝同共十八字作小篆其面分寸如畫按古人治

律一曰審度度長短者不失豪釐度有五分寸尺丈引而尺居中減之爲分申之爲丈故黃鐘而下率以尺起數焉班志曰其法用銅高一寸廣二寸長一丈而五度具雖孝武時樂官考正至元始中條奏取詳卽此銘所謂劉欽銅尺也鐳作劉後漢建字下所闕必初字肅宗元和元年待詔殷彤上言官無曉六十律者待詔嚴崇之子宜補學官生治律不能罷又九十四年爲熹平六年太子舍人張先等閱舊藏乃得其器必尺在其中卽所謂建初銅尺蓋建初九年八月改元元和尺爲未改元時所造故稱建初也晉志云起度之法漢志言之詳矣故此銘以漢志爲準又云武帝太始九年中書監荀



勗較大樂不和始知後漢至魏尺長于古四分有餘勗乃合著作郎劉恭依周禮制尺所校五法有七品其七日建武銅尺則予前疑建字下闕者乃武字非初也勗之時用魏杜夔尺而人稱勗精密惟散騎侍郎阮咸譏其聲高非德正至和之音必古今尺有長短所致會咸病卒武帝以勗律與周漢器合用之卽此銘所謂晉前尺竝同也後始平掘地得古銅尺歲久欲腐不知所出何代果長勗尺四分人皆服咸之妙又按章帝時零陵文學史奚景于泠道舜祠下得玉律度以爲尺謂之漢官尺校勗尺短四分比始平尺度同如杜夔所用調律尺比勗尺得一尺四分七釐又魏景元年劉徽注九章

云王莽時劉歆斛尺弱于今尺四分五釐比魏尺其斛深九寸四分五釐卽勗所謂今尺長四分半也蓋勗尺爲調律之用未甚流布于人開元帝後江東所用之尺校勗尺得一尺六分二釐而後知此尺之短止于調律也

晉銅滲槃銘

右槃銘云泰始九年口月七日右尙方治將作府故二斗五升銅滲槃重九斤八兩第三云說文槃爲承槃而篆作盤俗用之此銘作槃隸書也晉將作有事則置而此云右尙方治將作府則宮中所用之槃也滲下漉也封禪書滋液滲漉則此槃爲漉水之用無疑尺與槃皆藏



趙氏

古器物銘第八

趙氏模本


右松雪摹本三十三器皆從器上拓下非石本也去其爲博古圖鐘鼎法帖歐陽永叔劉原父趙明誠所釋者存三之二而獨爲跋者又去其半松雪見聞廣搜討精所有止此信乎古器之存于世者少也夫有形之物雖金石而必弊昔人紀績鼎鐘亦一時自炫之事其所以不朽者惟三立是尙使徒恃堅金巨石卽秦碑斯篆又何庸哉

秦氏拓本

右秦氏摹本題云畢良史少董得古器于盱眙權場摹十五種寄秦熈熈乃檜之子伯陽也錄其六皆非薛尙功款識所有者舊藏于嘉興項墨林今歸曹侍郎秋嶽侍郎好古等于飲食出其所藏助予錄補爲多



光緒歲在丁亥仲春之月吳縣朱記榮槐廬家塾校刊  
金石錄補卷第一



金石錄補卷第二

跋尾

槐廬叢書

崑山葉奕苞九來著

吳縣朱記榮校刊

夏大禹衡山碑

周立殷比干墓碑

秦羽陽宮瓦銘

秦會稽山刻石

秦泰山無字碑

漢長樂甄字

漢魯孝王刻石

漢郟縣碑

漢邯鄲君墓甄文



漢蜀郡太守何君閣道碑

漢牛跡山茅君碑

漢豫州刺史路君闕

漢張賓公妻穿中二柱文

漢汝伯寧甄文

漢蠶崖石刻

漢南安長王君平鄉道碑

漢永初甄文

漢討羌檄

漢延年益壽題字

漢武陽官擊文

漢賜豫州刺史馮煥詔

漢馮煥碑陰

夏大禹衡山碑

右衡山碑共七十七字其文云承帝曰嗟翼輔佐卿洲  
渚與登鳥獸之門參身洪流明發爾興久旅忘家宿嶽  
麓庭智營形析心罔弗辰往求平安華嶽泰衡宗疏事  
哀勞餘神禋鬱塞昏徙南瀆衍亭衣制食備萬國其寧  
竄舞永奔王象之輿地紀云禹碑相傳在岫巖峰或云  
在衡山縣雲密峰宋嘉定中蜀士因樵人引至其處搨  
之得七十二字何政子一模刻于嶽麓書院者多五字  
其字非科斗蟲書玉筋文似世傳五嶽真形圖較淳化



帖中禹篆十二字不相類輿地圖志江西廬山紫霄峰  
下有石室室中有禹篆文好事者緹入摹得七十餘字  
惟鴻荒漾余乃權六字可識極似此碑唐之劉禹錫則  
云傳聞祝融峰上有神禹銘古石琅玕姿祕文龍虎形  
韓愈則云岫嶠山尖神禹碑字青石赤形模奇崔融則  
云於爍大禹顯允天德龍書傍分螺書匾刻似古來有  
之非嘉定中始出也徐靈期衡山記云夏禹導水通瀆  
刻石名山之高則此碑爲神靈之蹟無疑矣

殷比干墓石

右比干墓碑在汲縣漢隸釋文漢隸字源辨其謬然比  
干爲千古殺身成仁之第一人而尼父是其族孫爲之

標識宜也以疑傳疑存之亦無不可水經云朝歌縣比  
干冢前有石銘隸云殷大夫比干之墓今已中折不知  
誰人所誌洪氏云大觀中會稽石國佐有此四字比水  
經又闕其三字畫清勁乃東漢威靈時人所書者如歐  
趙皆未之見予按今存四字乃隸書決非宣聖之筆洪  
說當不謬也

秦羽陽宮瓦銘

右銘羽陽千歲四字若雲篆元駱天驤曰得于鳳翔寶  
雞縣狀若今之箭瓦蓋秦羽陽宮瓦也按長安圖志云  
羽陽宮秦武王起在東倉司馬氏記武王事甚略但有  
力好戲則治宮室或有之去始皇立石頌德之歲前八



十八年此瓦猶屬周末所造而繫之秦者羽陽爲秦之宮殿也瓦與碑不類以其奇古錄之天驤又云好事者刻諸石中統二年在鳳翔天慶觀見游轉運模本按轉運名師雄字景叔宋紹聖閒人則此銘流傳已久不止天驤一人識賞也未有斯籀以前大約近鐘鼎文字銘若雲篆無足怪焉元陸友仁硯北雜志云宋元祐六年正月寶雞縣門東百步權氏浚地得古甬瓦五此獨完好面徑四寸四分隱起四字隨勢爲之不取方正予得模本于雒陽朱希真家

### 秦會稽山刻石

右會稽刻石元申屠駟跋云攷諸記載始皇及二世抵

越取浙江岑石刻頌于山李斯筆也予以家藏舊本摹勒于會稽鬻舍與嶧秦等文並傳于後都少卿云世人稱秦望山碑在會稽縣東南四十里宋書載竟陵王子良尅日登秦望山主簿范雲以山上有始皇石人多不識乃夜取史記讀之明日上山雲讀如流子良大悅以爲上賓則晉宋以來石固無恙歐陽公趙明誠皆集古文此獨見遺今之所傳卽申屠模本其家藏舊刻當爲范雲所讀原本也史記與碑互異數十字云

### 秦泰山無字碑

右碑在泰山絕頂相傳爲秦始皇立顧寧人以爲立于漢武帝辨駁精確實無可疑而余猶書秦者以此碑爲



世所習聞姑狗俗之稱而全錄寧人之辨以證之曰嶽頂無字碑世傳秦始皇立按秦碑在玉女池上李斯篆書高不過四五尺而銘文并二世詔書咸具不當又立此大碑也考之宋以前亦無此說因取史記反覆讀之知爲漢武帝所立也史記秦始皇本紀云上泰山高石封祀祠其封禪書云東上泰山泰山之草木葉未生乃令人上石之泰山巔上遂東巡海上四月還至奉高上泰山封而不言刻石是漢石無文字之證今碑是也後漢書祭祀志亦云上東上泰山乃上石立之泰山巔然則此無字碑明爲漢武帝所立而後之不讀史者誤以爲秦耳

漢長樂甄字

右長樂甄字云長樂大漢五年十月長安都鄉訖工長尺有二廣三之二高半之共三行十四字長樂二字差大爲一行餘爲兩行其字在篆隸之間乃成甄後所刻以是上諸官爲式也順治初長安縣民治墓地獲甄數十枚而有字者二東孝廉收此穴其後爲硯色潤質堅攜至京師吾邑宋閔叔見之擊按嘆曰有是哉孝廉問何謂宋曰此西漢刻也簡高帝紀五年五月車駕西都長安後九月徙諸侯于關中治長樂宮正義云宮在長安縣西北十五里長安之民陶以供用此甄爲長樂宮物無疑古之爲工者有規矩卽有度量布指知尺舒肱



知尋積而計之雖王制疆域道里可以頃刻定焉何況  
宮室高下廣狹總在此一輒之積而已以今尺較之減  
二寸古尺短也辛氏三秦記云長安地皆黑壤此輒黝  
而微黃土氣盡矣而光澤可鑿不異于端石之佳者東  
君于是襲以紋錦與所藏顏魯公真蹟同爲珍玩云閔  
叔拓本寄予曰子爲錄補其以是壓卷蓋在趙錄陽朔  
輒前更遠也

漢魯孝王刻石

右石金高德裔修孔廟掘太子池得之太子者景帝子  
名餘封于魯俗呼爲太子也池在靈光殿基西南三十  
步曰五鳳二年宣帝號也又曰魯三十四年德裔以爲

餘孫孝王時也又曰六月四日成者當時建廟鑿池記  
其成功之日也歐陽公得林華宮行鐙銘以爲始有前  
漢字補余之闕曾未有石本也趙氏止鄭三益闕銘陽  
朔磚字居攝墳壇二刻石耳此碑旣湮沒而復出豈非  
神物不終晦歟顧炎武曰上書天子大一統之年而下  
書諸侯王自有其國之年此漢人之例也三代之時侯  
國之爲史者但書本國之年而不書天子之年漢時諸  
侯王得自稱元年前書諸侯王表楚王戊二十一年爲  
孝景三年楚王延壽三十二年爲地節元年之類是也  
又考漢時不獨王也卽列侯于其國亦得自稱元年史  
記高祖功臣侯年表高祖十八年平陽懿侯曹參元年



孝惠六年靖侯窟元年孝文後四年簡侯奇元年是也

漢牛跡山茅君碑

右碑在江寧府牛跡山西漢永光五年立友人鄭簠谷口報予云順治初年嘗有搨本殘缺存數字黃冠拒人搜索瘞之敗垣下先賢陳芹洪崖詩有絕巘金牛跡元宮玉版書謂此碑也谷口工漢隸為海內名家好金石文字東岱西華孔廟諸碑皆築蹇身至其下手自摹拓許覓此碑見惠姑俟之

漢郫縣碑

右碑云建平五年六月郫五官掾功平史石工敷徒要本長廿五丈價二萬五千按郫蜀郡之邑必為治道訖

記石工工價之數前漢哀帝建平五年已改元壽此碑猶書建平者遠在蜀中豈詔猶未至邪如孝獻初平止四年而文翁柱記亦書五年之類是也紀元建平者自漢哀之後凡八皆不在蜀而五官掾又為西漢官名如西京末郭唐為信都五官掾見于後書則此為漢刻無疑趙駿烈紀元類編于建平下遺魯爽宜補入

漢郫君墓甄文

右甄文篆書云建武二十八年北宮衛令郫君千秋之宅其一甄有富賢昌字洪氏隸續云得之蜀中范平闕旁按郫君墓甄署官秩而遺名字似失標識貽遠之意然漢人碑碣往往稱某君之子之孫而亦不詳著祖父



之諱或當時簡樸習俗然也法書要錄載章武二年作  
一鼎賜魯王銘曰富貴昌宜侯王蓋蜀人采用成語故  
與此甄同

漢蜀郡太守何君閣道碑

右何君閣道碑蜀中棧路謂之閣道華陽國志云道至  
險有長嶺楊母閣之峻昔楊氏倡造作閣故名焉蜀人  
名此碑曰尊榎閣碑建武中元二年立范書建武三十  
二年四月改元中元而祭祀志云以建武三十二年爲  
建武中元元年宋莒公紀年通譜云紀志俱出范氏而  
所載不同必傳寫脫誤學者失于精審耳愚按帝紀卽  
位建元大書建武至三十二年四月始改中元其義甚

明若祭祀志總敘祀事三十二年之二月封禪太山四  
月特告太廟在改元以後故蔚宗行文連而及之諒無  
深意此碑立于中元二年似不應復書建武洪氏据先  
石林公避暑錄云韓汝玉家有銅料其銘曰新始建國  
天黃上戊六年以爲當時習俗以卽位初元冠于新歷  
之上不知漢書已有建武中元二年倭奴國奉貢之語  
與此碑同則洪氏非無徵矣予初意凡歐洪二氏所集  
之碑皆不入錄以其已見于集古隸釋也友人歸莊元  
恭曰君補趙氏所遺之碑得于目覩者固快卽前賢近  
哲載記可信者亦須博採况集古隸釋與趙氏先後成  
書碑或尙在人間與其分著于兩家何若彙收于一錄



予承其教始參用跋語而辨論之猶隸釋錄歐趙兩公跋也

漢豫州刺史路君關

右關永平八年立漢明晉惠北魏主恪隋李密蜀主王建皆號永平而無八年者故斷之為漢也

漢張賓公妻穿中二柱文

右張氏穿中記本賓公之妻之穴其子偉伯伯妻與孫陵葬右方曲內中而偉伯子長仲與少子叔元卒其孫元益又葬其父與叔也宋紹興丁丑年武陽城東彭亡山之巔耕夫斲地有聲尋罅入焉石窟如屋中立兩崕崕柱左右各分二室左右有破瓦棺入泥中右方三崕

權泥穢充物以燭視之得題識三所一在門旁為土所蝕厘存其上十餘許字沙石不堅數日閒觀者揩摩悉皆漫滅其二在兩柱稍高拓之上距漢建初丁丑千八百有一年云范志武陽縣有彭亾聚而非山注云岑彭死處南中志縣南三十里彭墜山而非亾在縣南而非東益州記山下有彭祖冢上有彭祖祠而非岑彭死處世遠地僻莫可深考姑列此以俟知者

漢汝伯寧甄文

右甄文六行十八字云建初三年八月廿日汝伯寧關萬歲舍大利善與曹叔文建初七年甄文萬歲署舍同古人塋墓卜築之甄大約有字甄用萬歲千歲千秋等



語當時風俗淳樸略無忌諱若此

漢蠶崖石刻

右刻在蜀郫縣范功平摩崖之西五十餘步其文云故此省三處間直錢萬二千永元六年口口石共十有六字字縱橫二三寸許大小不等而筆意精妙按洪氏跋郫縣碑云蜀中名之蠶崖碑當是其地名也此刻去前碑甚近故余以蠶崖名之乾道中太守晉原李公作屋護焉崇禎末友人徐蓮生同陸丈子敏入蜀搨歸寶愛不以贈人蓮生無子所藏皆不可復問惜哉

漢南安長王君平鄉道碑

右磨崖刻四百餘字云惟平鄉明高大道北與武陽西

與青衣越雋通界回曲危險永元七年扶風王君為民興利除害遣掾何章史道興修治故書崖以頌之中有掾史橋義任政楊莫楊宏丞即什郝王卿尉綿竹楊卿按掾史稱名而丞尉不名蓋書崖者尊之也應劭云小縣命卿二人為一丞一尉此碑稱卿與其說合

漢永初輒文

右輒云永初元年景師造大吉陽宜侯王古文字少每多假借至漢已備假用尤甚如以羊為祥猶假其字體之半漢綏民校尉熊君碑治歐羊尙書乃以羊為陽假其音矣此碑又以陽為祥直從羊字轉借為可異也

漢賜豫州刺史馮煥詔



右詔云告豫州刺史馮煥漢詔之式也漢制有四一曰策書締簡也其制長二尺短者半之篆書起年月日稱皇帝以命諸侯王罪免三公亦賜策而以隸書用尺一木兩行書之二曰制書其文曰制詔三公皆璽封尚書令重封露布州郡三曰詔書其文曰告某官云云如此詔也四曰詔敕其文曰有詔敕某官皆自上行下之文也

漢討羌檄

右檄文云永初二年丁未朔廿日丙寅得車騎將軍莫府文書上郡屬國都尉二千石守丞廷義縣令三水十月丁未到府受印綬發夫討畔羌急急如律令馬卅疋

驢二百頭日給共六十五字陽羨張駒跋云宣和中陝右人發地得木簡一瓮字皆章艸朽敗不可詮次惟此檄完中貴人梁思成得之乃以入石云予按此檄討羌歲月與范史不合黃長睿辯之已詳不復述以東漢章艸絕少故補入焉急急如律令今道家符錄科猶用之漢延年益壽棹題字

右題字云永初七年四月卅日造焉向是萬歲延年益壽棹當是壽冢中所刻如梁相孔耽碑之類

漢武陽官擊文

右擊文云永初卅年作官擊七字蜀之眉州掘武陽故城得之洪景伯范至能各藏其一特七官二字反背不



同各重十有八斤按說文塹未燒甄也儀禮注累塹爲之不塗塹所謂塹室也廣韻謂之土塹若未燒之甄豈能築城久而不做此必造塹時刻記年月成磚後以之築城耳

漢馮煥碑陰

右碑陰殘缺有諸曹史及帳下司馬武剛司馬十餘人兩漢太守皆得自置僚佐緣事增止而邊郡所置尤濫卽官名亦不必出于官制之所有也如武剛司馬武猛吏之類是也

光緒歲在丁亥仲春之月吳縣朱記榮槐廬家塾校刊  
金石錄補卷二

金石錄補卷第三 跋尾

槐廬叢書

崑山葉奕苞九來著

吳縣朱記榮校刊

漢逍遙山石窟題字

漢縣三老楊信碑

漢益州太守無名碑

漢韓敕修孔廟碑兩側人名

漢江原長進德碣

漢孝子嚴舉碑陰

漢司徒孔峽碑

漢劉讓閣道題字

漢孔君碑



漢李翁天井碑

漢東海廟碑陰

漢司隸校尉楊淮碑

漢米巫祭酒張普題字

漢司隸校尉魯峻碑陰

漢婁壽碑陰

漢武都太守耿勳碑

漢鄭子真宅舍殘碑

漢豫州從事尹宙碑

漢金廣延母紀產碑

漢舜子巷義井碑陰

漢溧陽長潘乾校官碑

漢逍遙山石窟題字

右碑前正書東漢仙集四字另一行隸書漢安元年四月十八日會仙友集十三字後正書畱題洞三字按漢安爲順帝年號是時尙無正書此必勒在山崖礮壁後人增書之也元吾子行云八分與隸有辨八分漢隸之未有挑法者也比秦隸則易識比漢隸則微似篆此則挑法全備似孔宙孔彪諸碑所謂漢隸也字畫縱橫二寸許精采煥發爲毛季公藏帖第一碑在簡州逍遙山石室丹竈尙有存者

漢縣三老楊信碑



金石錄卷第三  
右碑首云故縣三老楊信字伯和剝不可句中有惟  
兮和平大漢元年洪氏以惟兮爲嘆息之詞和平乃威  
宗紀年似無可疑者第敘紀元在大漢之上爲行文之  
一變耳祭義食三老五更于太學乃優賢之典而非職  
漢高入關舉民年五十以上有修行能帥衆爲善置以  
爲三老鄉一人此鄉三老之始也百官志鄉置有秩三  
老游徼本註曰掌一鄉人而縣與侯國無之豈前書有  
是秩而後不復置邪然趙錄有國三老袁良碑與此碑  
縣三老可以補漢志之缺後書王景傳父閎爲郡三老  
則郡亦與國邑同有此秩也

漢益州太守無名碑

右碑以朱雀爲額龜蛇爲趺龍虎啣璧在兩旁一崇碑  
也首云永壽二年三月十九日益州太守某君卒而闕  
其姓或云是馮君碑碑之左有功曹故吏四十八人姓  
之可見者五人而已要皆屬邑建伶牧靡楛棟滇池穀  
昌俞元之人也楛兩漢書皆作弄碑陰又有牧靡故吏  
三人在趺之右上刻五玉三獸下一九首漢碑如是者  
甚多

漢韓敕修孔廟碑兩側人名

右題名在漢韓明府修孔廟禮器碑之側共三十五人  
不書名者十一人不稱字者三人不書地者二人稱故  
者三人已見于碑陰者孔建壽一人陰則干而此則二



百似續出錢者碑陰不及載而書之兩旁也張建平下則云其人處士又有蕃王狼子二百在冢下無論趙氏遺此卽洪氏隸釋亦不載予于康熙戊午秋丁日親至碑下拓歸錄入

漢江源長進德碣

右碣云君諱就字進德而亾其姓似碑非碑似闕非闕在蜀中

漢孝子嚴舉碑陰

右嚴舉碑陰主吏督郵八人先書其姓于官秩之上而繼之以諱某字某此他碑所未有也

漢司徒孔峽碑

右碑見于東家雜記洪氏跋司空孔扶碑引碑錄云司農孔峽碑在仙源縣墓前建寧元年立農峽二字乃傳寫之誤洪直以峽爲扶也按闕里祖庭記自有司空孔扶碑祖庭東家二記同出孔氏自應不謬况空農扶峽誤亦不易且峽爲司徒非司農也扶碑建于四月峽碑在八月月日又不同惜雜記止載其目耳

漢劉讓閣道題字

右題云建寧元年十月上旬工榘爲武陽劉讓造共十六字相傳在蜀中閣道上三代以前四民各卒其業事必有成而名亦垂久兩漢去古未遠雖工作之微率欲傳聞于世以示其所治之精此碑是也漢碑榘爲之榘



金石錄卷之三  
四  
皆作健

漢孔君碑

右孔君碑集古錄云其名字磨滅不可見而世次官闕粗可考云孔子十九代孫潁川君之元子也舉孝廉除郎中博昌長遭太君憂竟拜尙書侍郎治書御史博陵太守遷下邳相河東太守建寧四年十月卒按東家雜記漢孔宏碑所署之官適合則此孔君之名乃宏也雜記成于紹興甲寅後于歐公治平甲辰跋碑之歲蓋已七十一年而名字尙可識豈集古所收之碑偶殘泐邪抑此孔君非宏也邪姑記之以俟再考

漢李翁天井碑

右碑武都太守治路紀德磨崖碑也翁治武都橋道前後三處各刻一碑架閣則卮閣鑿崖治路則西狹天井西狹碑刻于建寧四年卮閣天井兩碑刻于次年六月趙氏所收三碑有碑陰而非天井洪氏云趙以龜池五瑞碑爲陰乃西狹碑之前數行也曾子固跋西狹碑云翁與功曹史李旻定筴敕衡官掾仇審治東坂有秩李瑾治西坂鐸燒火石人得夷塗其文有二所識一也按析里橋卮閣頌後刻仇審字孔信而無李旻李瑾知天井爲西坂矣洪氏云天井吏屬卻有李旻姓名信曾跋非謬歐趙集碑時天井碑未出武都樵人于近歲斬刈藤蔓始見石上有天井字倚崖縛架椎拓甚難而寺僧



金石錄卷第三  
反以惡木蔽之云云碑文載隸續中碑後有武都丞呂國已下題名仇靖字漢德書文卽郝閣頌亦靖之作

漢東海廟碑陰

右云闕者秦始皇所立名之秦東門闕事在史記凡十七字在東海廟碑之陰洪氏據碑錄胸山有秦始皇碑云漢東海相任恭修祠刻于碑陰是此也前碑爲東海相滿君追頌前相桓君而立任恭當又在滿君之後第所題非修祠事按始皇三十五年作阿房宮後立石東海上胸界中以爲秦東門任君記此不特追溯古蹟亦見滿君之碑在胸也碑錄竟以爲秦始皇碑者誤趙氏敘碑在永壽元年不知永壽爲桓君爲相之時若滿君立碑則在熹平元年相去已十八年矣

漢司隸校尉楊淮碑

右楊淮碑同郡卞玉字子珪以熹平二年二月廿二日謁墓而立直敘其諱淮字伯邳與從弟諱弼字穎伯各舉孝廉所歷之官秩而贊之云元弟功德牟盛當究三事不幸早隕國器名臣州里去覆二君清頌約身自守俱大司隸孟文之元孫也末則自署姓名而已此古碑中之矯矯者蔡中郎爲郭有道碑自云無媿庶幾近是洪氏云凡稱元妃元子元兄元舅之類皆以長言之二楊俱曰元孫猶元士然以爲美稱也按淮稱弼爲從弟弼又字穎伯以其祖視之俱爲諸子之長孫非美稱也



至獨悼穎伯未登三公之位而卒故稱元弟以美之若  
國器二語則總歎二楊之亾也准爲司隸時劾治梁冀  
婦家子汝南太守孫訓見華陽國志

漢米巫祭酒張普題字

右題字凡七行六十七字其文云熹平二年三月天卒  
鬼兵胡九字闕二仙歷道成元施延正一元布于伯氣定  
召祭酒張普萌生趙廣王盛黃長楊奉等詣受微經十  
二弓祭酒約施天師道法无極才按范史劉焉傳云順  
帝時張陵客于蜀造作符書受其道者出米五斗陵傳  
子衡衡傳子魯其來學者初名鬼卒後號祭酒注云熹  
平中妖賊大起漢中張修爲太平道張角爲五斗米道

使病人處淨室思過祭酒以老子五千言都習爲請禱  
之法此碑題于熹平與傳註合且有天師道法祭酒鬼  
兵等受微經云云應是妖黨相傳授受而胡九者初入  
黨之人也語云國將亾聽于神桓靈之際漢祚已衰妖  
賊橫行覲巫尤劇然有立國之初學士大夫或爲機祥  
之說所蠱使託名仙釋者夤緣而進所不解也巴郡太  
守樊敏碑亦有米巫舛虐之語

漢司隸校尉魯峻碑陰

右魯峻碑陰載故吏四人門生三十七人義士一人按  
峻碑熹平元年卒明年四月葬于是門生汝南于沛  
國丁直魏郡馬萌勃海呂圖任城吳盛陳畱誠屯東郡



夏侯宏等三百廿人刊石敘哀而此載四十餘人其脫略者多矣洪氏隸續載魯峻斷碑陰九十有一人書姓氏而不名有郡者二人與此迥異洪跋云據藏碑者以爲魯君碑陰度其石之廣與魯碑合所存止尺有七寸乃其下之四橫橫三十有四人計其上當有十橫也蓋洪在南宋與東齊阻絕不見此碑故仍傳文之誤余則身至碑下乃爲可信卽都少卿穆金薤琳瑯所載闕字以予家藏本較之可識者數十字更遺脫平原王口子行以下八人少卿素稱博洽謬誤乃爾豈當時所收殘失或鏤板脫落否則碑在濟寧並非僻遠曷不稍加考較乎

### 漢婁壽碑陰

右碑陰共五十八人漫滅者四人南郡汝南止二人婁姓者十二人餘皆南陽人而有葉令蓋當時仕者不避本籍如朱翁子之爲會稽太守也諸人皆書字似非所以尊婁先生者豈以其爲鄉里而字之邪宋嘉祐中歐陽公自奄陵貶所再遷乾德令按圖經求此碑在壽墓側文忠率縣學拜其墓遷碑還縣立于敕書樓下未知今在否

### 漢武都太守耿勳碑

右碑云漢武都太守右扶風茂陵耿君諱勳字伯瑋其先本自鉅鹿則是耿純耿弇之後又云熹平二年二月



到官又云歲在癸丑淫雨傷稼開倉賑贍身冒炎赫至屬縣巡行給餐千有餘人出奉錢賑衣賜給寡獨王佳小男楊孝等三百餘戶減省貪吏二百八十人百姓樂業云云熹平三年四月廿日壬戌西部道橋掾下辨李璽造按靈帝熹平二年癸丑卽勲蒞任之年也給餐卽今設粥賑飢之類使勲止于撫循而不減省貪吏則民樂歲終身苦矣語曰去莠去其害苗者也錄是碑不無有感于未造已

漢鄭子真宅舍殘碑

右碑首闕一字下云所居宅舍一區直百萬又云故鄭子真地中起舍一區作錢闕又云故鄭子真舍中起舍

一區直七萬又云故潘蓋樓舍并二區又有故呂子近樓一區故像樓舍一區口扶母舍一區口鳳樓一區口口車舍一區口口奉樓一區口口子信舍一區共十有二區其後有妻無適嗣口桃爲後之語且列弟郎中及賊曹掾史胡恩胡陽陳景姓名似是敕斷財事官爲檢校之文所謂起舍者蓋在故鄭子真地中起舍建宅非卽鄭子真之宅舍也竟以鄭子真宅舍爲名似未可信

漢豫州從事尹宙碑

右尹宙碑云君諱宙字周南其先出自有殷乃迄于周世作師尹因以爲氏又云家于鄢陵克纘祖業治公羊春秋歷主簿督郵五官掾曹守昆陽令辟從事年六十



有二熹平六年四月己卯卒顧炎武曰碑在鄆陵縣豫  
字磨滅以其潁川人而言本州知其爲豫州也按姓譜  
尹與伊衡皆本伊尹故云出自有殷也崧高詩註云尹  
官氏也風俗通云師尹三公官也以官爲姓夫碑者悲  
也悲其人銘者名也名其德宙處卑位勒名金石當必  
有足稱者銘云位不福德壽不隨仁福解作副按福音  
富與從示者不同壽字隸法亦少異于婁壽張壽諸碑  
夫漢碑莫備于隸釋而失載豈物之顯晦固有時也歟  
此碑爲山右閭百詩所贈百詩博洽多聞于經史有辨  
論遇于京師今家淮安

漢金廣延母紀產碑

右碑云光和元年五月中回金廣延母自傷紀考徐氏  
元初產永壽元年出門托軀金掾季本又云子男恭字  
子肅年十八口收從孫卽廣延立以爲後年十八娶婦  
徐氏弱冠口後歿又云季本平生素以奴婢田地分與  
季子雍直蓄積消滅責負奔亡其下估計地畝價直又  
云悉以歸雍直云云蓋爲恭與廣延連繫而以財產歸  
幼子雍直直少不類會廢其家故大書深刻以示宗黨  
其母亦云苦矣第此碑云從孫而金恭碑跋直以廣延  
爲弟豈爲人後者爲之子卽從孫可以彌其祖邪且雍  
直季本之子何不云金雍直母而反書亡者廣延使不  
以亡者爲諱亦宜首及長子書金恭之母而竟書廣延



何也

漢舜子巷義井碑陰

右碑陰稱五大夫者三十一人稱分子者六十人殘泐者數人碑係漢靈帝光和中立而猶稱五大夫者蓋漢承秦制爵二十級其第九級爲五大夫安帝永初三年三公以國用不足奏令吏人納錢穀得爲關內侯虎賁羽林郎五大夫緹騎營士至靈帝光和元年開西邸賣官自關內侯而下入錢有差故此碑五大夫若是之多知是時比屋皆入錢受官也惟分子則洪文惠公引穀梁傳燕周之分子注燕爲周之別子孫也而以此碑分子爲土豪出分子子恐其義未安蓋以治井公事安得

土豪之子獨令出分者助財子按左傳振廩勸分此輩皆無官級因勸分而與者猶之他碑義士義民也且止治一井而五大夫各出本二萬分子各出本三千似其費過多據水經云義井出隨城東南常湧溢而津注下流與澇水合南注于涓非穿鑿之井可比故其工費不貲也

漢溧陽長潘乾校官碑

右碑靈帝光和四年造溧陽頌其長潘君諱乾字元卓興學官講賓射碑也首云蓋漢三百八十有七載或謂高祖己亥卽位盡更始庚申光武建元乙酉至光和辛酉共三百八十三年按高祖入關滅秦在乙未卽代統



更朔之年碑未嘗誤也後刊丞尉曹掾等姓名而無故  
字知為潘君在位時立夫生日頌死日誄而碑有其誄  
曰何邪溧陽誌潘君字元貞當以碑為正碑在溧水張  
子令則搨以見貽字皆完好閒有闕文云

光緒歲在丁亥仲春之月吳縣朱記榮槐廬家塾校刊  
金石錄補卷三

金石錄補卷第四

跋尾

槐廬叢書

崑山葉奕苞九來著

吳縣朱記榮校刊

漢司隸從事之碑

漢白石神君碑陰

漢張景題字

漢神氏石甬刻字

漢蕩陰令張君碑

漢蕩陰令張君碑陰

漢外黃令高君碑

漢曹全碑

漢魏鍾繇賀尅捷表



漢黃龍甘露碑

漢司徒掾梁休碑

漢啓母石闕題名

漢少室神道石闕銘

漢郎中王君碑

漢李翊夫人碑

漢北屯司馬沈君神道二

漢高直闕

漢麒麟鳳凰碑

漢詔賜功臣家五字

漢中部碑

漢平原東郡門生蘇衡等題名

漢是邦雄傑碑

漢司隸從事之碑

右碑立于光和四年文字缺滅亾其姓氏鄉里歐氏謂之無名碑

漢白石神君碑陰

右白石神君碑陰在無極縣立石者南陽馮巡元氏令

京兆王翊漢政旣衰巫風日熾所載務城神君李女神

君軛石神君壁神君名號殆因白石連類而及之者碑

建于光和六年是歲妖人張角起矣

漢張景題字



右題字四行在高睽石室梁上磨滅殆盡首句云光  
和六年四月太守張景中有追念先祖孤歿自悲之語蓋  
造象追遠之作

漢种氏石馬刻字

右刻字云元和七年四月五日己丑孝子种覽元博所  
造在种氏墓石馬膊上如宗資州輔二墓獸膊刻字之  
類但此記年月與孝子姓名其意鄭重不同耳

漢蕩陰令張君碑

右蕩陰令張君碑云君諱遷字公方陳畱已吾人有周  
張仲之後治京氏易少爲縣吏徵拜郎中除穀城長遷  
蕩陰令中平二年二月故吏韋萌等刊石立表蓋去思

碑也都少卿云予生去宋數百年一見是碑于景太史  
伯時再見于文翰林徵仲而歐趙洪鄭諸錄皆弗載苞  
于顧氏購得之碑以殯爲賓禽爲擒中爲忠固矣又有  
旣且于君則析暨字爲旣且何也

漢蕩陰令張君碑陰

右張遷碑陰韋氏二十六人范氏十人汜氏二人孫氏  
原氏騶氏各一人前碑云故吏韋萌等刊石立表而此  
自故安國長韋叔珍以下皆從事守令及吏而不名何  
也不署郡邑豈皆蕩陰之人仕于外如安國者非必張  
君之所屬耶然故吏范巨范成韋宣忽書名又何也止  
載助錢之數別無文字故不可深考爾



漢外黃令高君碑

右碑首行闕十四字其姓氏族里皆磨滅銘有光光高君之句知其姓高元祐中吳郡取土于郭外獲此碑知其爲吳人也洪氏引范書文苑傳高彪無錫人去吳郡甚近遂以爲彪之碑無疑又云傳以外黃作內黃一字之訛耳予按碑云遷外黃令形不妄濫恩如皓春獄獄生草邦無怨聲中和之化莫與比縱後以舉將潁川太守南陽文君徵詣廷尉捐官赴之受知于太尉汝南許公表薦于光祿勳宏農楊公彪傳止載祖餞第五永于長安觀蔡邕等作詩彪獨作箴遷內黃令帝敕同寮臨送祖于上東門詔畫彪像于東觀不言其政事之美也使彪而受知于楊許又以文君故去官傳豈能遺之使此爲彪之碑則作箴祖送畫像之事諛墓者自當詳書何脫略至此且內黃屬陳畱外黃在魏郡豈宜以毫釐之差信其千里之謬乎大約文人好奇穿鑿附會以傳證碑不同乃爾予特改正爲高君碑姑俟博考碑以形作刑皓作浩縱作蹤通用也

漢曹全碑

右曹全碑漢靈帝中平二年造碑云君諱全字景完敦煌效穀人喻麋侯相鳳之孫鳳常上書言燒當事拜金城西部都尉也全以建寧二年舉孝廉光和七年三月除郎中拜西域戊部司馬時疏勒王和德殺父自立君



興師征討攻城野戰謀若涌泉和德面縛歸死諸國禮遺且二百萬悉以簿官拜邵陽令芟夷殘逆絕其本根云云按史疏勒王臣磐爲季父和得射殺而碑云和德殺父篡位與史異史又云涼州刺史孟佗遣從事任涉戊巳司馬曹寬長史張宴合兵三萬攻之不能下夫寬與全字不相類豈相傳之誤以全之字完爲寬也邪靈帝光和止六年碑云七年者于七年之冬改元中平也全爲永昌太守曹鸞之兄鸞以上書棄市禁錮黨人五屬全遭同產弟憂棄官後遇禁網潛隱家巷七年弛禁全得復官其年月與碑悉合顧炎武曰碑云大女桃斐楊雄反離騷昔仲尼之去魯兮斐斐遲遲而周邁師古

曰斐斐往來貌也列仙傳江斐二女則竟以爲妃之異文按魏書刑法志有河陰縣民張智壽妹容妃則固有以民間女而稱妃者又漢郭先生碑銘有娥娥三妃行追太妃碑爲季女所立直以爲妃而比之太妃何也

漢鍾繇賀尅捷表

右鍾繇賀尅捷表後云建安二十四年閏月九日南蕃東武亭侯鍾繇上歐公問集賢校理孫思恭此表閏在何月思恭以漢家四分乾象歷推之應閏十月合之陳壽魏志相符又證孫權獲羽在十二月不應于十月先上賀表而疑此書爲僞黃伯思云此賀徐晃于閏月之破羽非賀孫權之殺羽也按米元章書史劉次莊釋文



皆不及此表惟宣和御府藏真蹟錄入書譜中如繇尙  
書宣示白騎諸帖梁武帝評云雲鶴游天羣鴻戲海不  
能盡錄特以此表爲歐公辨證故存之與識者審定焉  
魏志是年九月相國鍾繇免故此表于十月但稱東武  
亭侯黃伯思曰東武南蕃之屬蕃音皮讀爲藩鎮之藩  
者誤又漢地理志魯國蕃縣音皮顏師古曰白衷云陳  
蕃爲魯相國故諱之曰皮此非南皮也意郡縣之名土  
俗各有別稱故相同邪杜佑又音逋袁切

漢黃龍甘露碑

右碑大小各一皆有額曰黃龍甘露之碑婁彥發云在  
眉州彭山縣大碑之首有十九字其小者云惟建安二

十六年餘皆磨滅不可辨碑陰亦皆漫漶存者兩橫每  
橫三十人隸釋云崇寧中爲王時彥所磨以刻其說矣  
按史建安二十四年黃龍見武陽赤水九日次年曹丕  
滅漢太傅許靖安漢將軍麋竺等上言武陽龍見君之  
象也與博士許慈議郎孟光立禮儀上尊號此碑有安  
漢將軍等官號碑陰有許慈孟光姓名卻與史合彭山  
卽漢武陽地建安二十六年爲昭烈章武元年蜀人不  
稱章武而稱建安應在未改章武之月故追奉舊正朔  
邪

漢司徒掾梁休碑

右碑云休字元堅察孝廉除郎中光祿主

下禁防既釋



辟司徒府卒後太守安平趙君請諡休爲貞文子而有  
守節曰貞博聞曰文之語銘三言中有遐尉罔復潛伏  
似皆謂黨事也碑錄云襄州穀城有司徒掾梁君碑建  
安廿七年立按建安終二十四年已亥豈吳人于孫權  
未稱黃武之前不用章武黃初而仍書建安歟洪氏曰  
中平初黨禁始解梁君應聘更二十餘年卒郡將至于  
論諡當不在夏恭范丹之下史策旣沒而無傳歐趙亦  
遺而不錄則士之澡身厲操能垂名于後者豈不難哉

漢啓母石闕題名

右石闕在嵩山崇福宮之左其半已積右方有字皆大  
篆風雨剝蝕且盡年號上隱隱一光字而戶曹史及辛

癸之間數字尙可識按紀元靈帝光和少帝光熹餘無  
號光者家兄慕廬以此闕與少室神道闕皆斷爲安帝  
時立或有誤焉

漢少室神道石闕銘

右題名篆書共十八行行四字可識者首行曰林芝次  
行曰日天第三行全泐四行曰三月三日五行曰郡陽  
城縣六行曰興治神道七行全泐八行曰君丞零陵九  
行曰泉陵薛政十行曰五官掾陰十一行曰林戶曹史  
十二行曰夏監廟十三行曰掾辛路長十四行曰西河  
陽十五行曰馮寶丞十六行曰陽祕俊十七行曰廷揚  
十八行曰曹史張此爲族兄登封令封字慕廬所貽且



云在少室東邢家鋪西可摹者二十一行郡陽城縣推之郡字上似應尙有潁川二字丞零陵以下與啓母闕題名參考之雖大同小異竟無關文皆在漢安帝時但有題名而囚其銘詞其林芝至三月三日似屬所題之尾而郡陽城一行則起手處也予將搨本校按跋語不可解者有三蓋可摹者二十一行今缺三行一也闕之勒字處恐不止四字之高郡陽城上應尙有字月日上定有紀元或卽在前所泐一行二也銘詞有無雖不可考而興治神道卽建闕之詞似以三月三日爲治道之日未必爲所題之尾三也且末幅張字下全闕則此闕之泐者多矣惜乎出都恩遽不及與慕廬訂之

漢郎中王君碑

右碑歐陽公云名字官闕卒葬年月皆莫可考惟碑首題云漢故郎中王君之銘又曰久而無弊者道隱而終顯者誠此君子之所貴若王君託有形之物欲垂無窮之名其弊金石何異乎瓦礫也而公之爲瀧岡阡表也何以列其世譜具刻于碑非卽王君欲託無窮之意哉至于今歐陽崇公久而愈著然非文忠之人之文自足不朽豈金石果真不弊乎惟德與言不可以不立若立功則時爲之矣

漢南陽太守秦君碑

右碑篆額十六字曰漢故南陽太守秦君之碑其名字



除拜不可考按天下碑錄秦君碑有二一在宜城一在南陽水經云秦頡以江夏都尉出爲南陽太守卒于南陽反葬宜城故有二碑也集古後錄云余昔從事總幕奉饗荆楚道出古郡于荒烟落日弔所謂秦君冢者有碑巋然剝蝕殆盡徘徊其下親視臨搨僅得數千百字歐趙二錄止得碑首皆南陽本也余今歷走邊徼探幽索隱無所不到訪南陽之石山矣惜哉據此則宜城秦君之碑爲趙錄所遺補之

漢李翊夫人碑

右廣漢屬國侯李翊夫人臧氏碑隸釋云九九十二之數殊未易曉愚按漢人碑文先敘其年壽及卒之歲月

或互見于銘誄之間碑云敬姜誨子節義踰古又云歲在大淵獻飛神天庭蓋歿于翊之後翊以熹平二年卒其歲癸丑則大淵獻應是光和六年癸亥也歎詞云壽十二兮九九期五三未兮衰在姬其意以爲願夫人之壽九九爲期而止得五十有二殆隱五字于下句曰五十三猶未及而姬已衰謝也又按邵子云自有天地至于窮盡謂之一元一元有十二會一會有一萬八百年太古之壽皆登十二會九九數之終五帝三王之世猶未天折也至于姬周而始衰前說似鑿後說似誕然文義皆通洪氏未之思耳

漢北屯司馬沈君二神道



右神道八分書其一云漢謁者北屯司馬左都侯沈府君神道其一云漢新豐令交阯都尉沈府君神道其上各刻朱雀形相向知是一人如王稚子闕書其所歷之官也東漢志宮掖每門一司馬有蒼龍朱爵東明北屯之名

漢高直闕

右闕云漢故高君諱直字文王九字漢人題墓所以禁樵採不皆鋪揚德業以欺後世有云神道有云墓道有云闕者惟金恭與此君但書姓名而已

漢麒麟鳳凰碑

右碑凡二石其像高二尺餘刻麒麟鳳凰較他刻二瑞

甚奇偉各以二字題其上字頗大而古非永建元年山陽太守所刻之碑也洪氏云胡承公見山陽碑兩旁有隸書六十九字而趙氏止得篆書與余同

漢詔賜功臣家五字

右字在成都墨寶云郭氏犁地得之又有小石一刻永平五年四字予意即前字所立之年未可知也

漢中部碑

右碑題額中部碑三字題名五十餘人皆主簿門下功曹門下游徼主記史功曹史門下賊曹右賊曹右金曹右戶曹右法曹及諸曹史嗇夫校官校官祭酒之類而缺失者多矣洪氏云謂之中部殊不可曉按漢官都尉



屬自三輔而外各分部治如會稽有西部回浦有東部  
陰平有北部臨洮有南部而北與成宜且如渠搜武臯  
侯成則皆爲中部都尉治關駟十三州志原亭城南中  
部都尉治司馬僚屬皆不治民此碑則中部所治之地  
嗇夫游徼與椽曹等吏頌德之碑陰也晉護羌校尉碑  
陰有中部都督中部督郵中部勸農之名洪氏云不曉  
何耶今陝西延安府有中部縣漢翟道地姚秦爲中部  
後魏爲內部而元明仍中部非此碑之中部也

漢平原東郡門生蘇衡等題名

右碑爲平原東郡北海陳留汝南潁川梁國下邳南陽  
東平十郡之士題名殘闕後可數者三十餘人而東郡

樂平蘇衡在第五其字亦闕名字全者二人平原濕陰  
馬象字世輔下邳徐祖叔字常眞名存者衡之外二人  
東郡樂平高扶平原股祝脩字存者十二人濕陰本濕  
陰應劭曰濕水出東武陽東北入海碑作濕前漢書作  
濕而後漢書作濕股本般前漢書註韋昭曰音通垣反  
顏師古曰爾雅說九河云鈎般如淳曰音如面般之般  
碑作股按樂平故清章帝所改則碑爲建初以後所立  
或題云孔府君碑陰又云在孔林駐蹕亭前駐蹕者宋  
眞宗謁孔墓後建也

漢是邦雄傑碑

右碑洪氏以碑首云是邦峻生雄傑峻之上下各闕一



字蓋言其山川孕秀也因無名氏故以是邦雄傑名碑然其中有晉楊侯苗由彼適梁犍為武陽則其姓疑是楊而家犍為也班書貨殖傳云篡弒取國者為王公圉奪成家者為雄傑又云王孫卿以財養士與雄傑交雄傑之人似非仁義道德之美名而漢人用之讚頌何與

光緒歲在丁亥仲春之月吳縣朱記榮槐廬家塾校刊  
金石錄補卷四

金石錄補卷第五 跋尾

槐廬叢書

崑山葉奕苞九來著

吳縣朱記榮校刊

漢學師宋恩等題名

漢仲秋下旬碑

漢故吏應鼎等題名

漢處士嚴發碑

漢五君栢梓文

漢司農劉夫人碑

漢繁長張禪等題名

漢杜宣等題名

漢博士題名



漢太尉劉寬神道

漢宏農太守張君題字

漢龍門禹廟宗季方題名

漢楊氏墓道

漢平楊府君神道殘字

漢殘碑十三字

漢蒙陰故縣莊碑

漢學師宋恩等題名

右題名石二一列經師經掾一列文學師諸曹掾史在成都府學禮殿高公石室東外壁自學師宋恩而下稱師者二十人史二人孝義掾業掾各一人易掾二人易

師三人尙書掾尙書師各二人詩掾四人春秋掾議掾文學孝掾文學掾各一人文學師四人從掾位集曹法曹賊曹辭曹毅曹金曹比曹兵曹水曹功曹諸史諸曹掾及督郵賊掾三十二人不可辨者十三人古者設爲庠序學校自世子以至凡民之子教以人倫及周旋灑掃進退應對之節又爲升造之法與郊遂之移示其黜陟故州里之善者多不善者勸六經旣立遂有經明行修之士亦必舉專門名家號爲師儒以啟迪之自經學不明乃有申韓雜霸之術流爲異端而二氏之說與六經並行于天壤矣後世以制義取士士借經書爲進身之階幸而獲售卽皮之高閣不復省覽所謂經明行修



者果如是乎蜀自梓潼文翁增設吏舍廣集師徒之後郡太守多以興崇學校爲己任此題名必頌德之碑陰前列諸師後及諸曹掾史也槩稱師者不以專經教授也經師之次有掾殆其佐也孝子順孫貞女義婦讓財救患及學士爲民之式者皆扁表其門以興善行故孝義文學皆有掾也外自集曹以下其名不一官備則事舉也諸人不序郡邑當是本郡人士集桑梓之賢良任官師之教養將益檢束其行履而未仕者知愧勵也後世仕除本籍往往貪汙苟免去其地而不之耻士行不端官方滋壞錄是碑可勝感嘆

漢仲秋下旬碑

右碑有仲秋下旬四字隸釋無額以此爲其人卒之月日据以名碑按婁彥發字源云碑額上二字不可辨第三楊字第四元字第五似秀字則此碑爲楊君無疑王氏復齋碑目亦作楊元君仲秋下旬碑墨寶云俗以爲文處茂碑未知何據銘辭云背爾嬪儷洪氏引禮記生日父母妻死曰考妣嬪疑此以妃匹之故不爲之避按爾雅父爲考母爲妣嬪婦也非必死後諱之之稱尙書嬪于虞詩聿嬪于京周禮九嬪之官同此義

漢故吏應酬等題名

右碑題名者自應酬而下共三十人而兩人之後則曰右郵口曰右江原二邑隸蜀郡必蜀郡太守碑陰也他



碑題名必書郡縣官字或出錢之數此止姓名亦題名之別式也

漢處士嚴發碑

右碑月日之上闕紀年而有彭城闕下桓譚陳章言處士嚴發有曾閔之行今聽表門閭云云知發為彭城人旌門之典見范書百官志孝子順孫烈女義婦皆扁表其門許慎云扁者題門戶之文也後世踵事增華乃有烏頭綽楔之制然古人里有里魁民有什伍善惡以告應表之家朝聞夕報而移郊移遂者亦不之赦故舉錯公而民爭勉于為善今之郡縣豈無節義非行賂請託則壅于上聞風厲之道不講久矣可勝歎哉碑云戊申朔

五日癸丑洪氏云此碑與武成同義如召誥戊午社于新邑越七日甲子是從戊至甲為七日畢命六月庚午朏越三日壬申亦是從朏至壬為三日也武成丁未祀于周廟越三日庚戌是祀廟之後三日去丁數與召畢二篇行文不同予按越逾也發語辭也蓋召畢二篇連數則用發語武成去丁日不數則用逾解如召誥若翼日乙卯以若字換越字同用發語也此碑果與武成同而少一越字耳

漢五君栢梓文

右大老君西海君東海君真人君仙人君十五字洛陽上清宮中祠五君于其旁有椴各三徑三寸餘黃伯思



長睿洛陽九詠其瞻上清篇云窪枰五兮石栝九註宮  
中有方石上列圓穴五楹穴九俗謂之九卯石側各有  
題卽上十五字其穴殊無刊刻之跡乃漢代所作以祠  
真仙之物圓者代枰楹者代栝就石爲之若窪尊之類  
洪氏云其文惟大老君三字最大蓋尊老子也六經無  
真字獨于諸子見之按延熹中蔡邕作王子喬碑及仙  
人唐公房碑已有真人之稱矣

漢司農劉夫人碑

右司農夫人碑太尉許馱之室也首行有標題存漢故  
二字次行云司農夫人祖自會稽山陰姓劉云云今許  
氏兩墓皆在宜興而此碑猶在夫人冢傍吳處厚青箱

雜記云義興許馱廟有碑許邵作唐開元中諸孫重刻  
題八字于碑陰云談馬礪畢王田數七徐延休讀之曰  
談馬爲言午言午許字礪畢爲石卑石卑碑字王田乃  
千里千里重字數七是六一六一立字洪氏云馱碑殘  
缺尙存數十字載馱自司農遷衛尉此碑稱劉氏司農  
夫人則銘墓時馱猶未爲衛尉也碑當在光和前立  
漢繁長張禪等題名

右蜀郡繁長等姓名一石三橫首行云長蜀郡繁張君  
諱禪字仲聞其次掾曹五人文學師一人五大夫二人  
校官掾一人惟五大夫屈暢校官謝就餘皆楊姓有與  
子雲同名者又稱民者三人縣肱卽船字例掾一人次橫







子雲司馬相如太守趙闕共十五人土卽士娉卽聘子雲相如蓋後人追書者洪氏云字清逸可妻邑子何鴻近自蜀歸云周公禮殿尙存未及搨諸碑也

漢博士題名

右題字七行亦在高睽石室中可識者五十六字不可識者五十餘字末有博士二字上下皆闕文以仲舒胡母生爲比蓋治公羊春秋者

漢太尉劉寬神道

右神道二其一曰漢太尉劉公諱寬字文饒其一曰漢太尉車騎將軍特進昭烈侯劉公神道夫神道爲表墓而設一書名字一書官諡詳簡得體漢人書法類如此

他碑太字無下一點而此碑有之劉寬有二碑皆中平二年立墓洛陽上東門外復有門生故吏兩碑不知更有此刻爲趙錄所遺信乎舊聞放失卽篤好者不能盡收也

漢宏農太守張君題字

右題字五行亦在高睽石室中末行云宏農太守張闕子陽張叔之子也其首行有故孝廉闕五陵相闕君伯高又有著德義方襲父經業云云則張叔疑卽伯高而父子皆以經學名家者

漢龍門禹廟宗季方題名

右題名在龍門禹廟自宗季方而下共四十一人洪氏



云尹阿祿郭阿胡王酉子桃他郡左池云數人俱非士  
君子名字按東漢無二字名者此或其字也覆姓四陵  
仲武一人可以補姓氏書之闕

漢楊氏墓道

右墓道隸書其一曰漢故益州太守楊府君諱宗字德  
仲墓道其一曰漢故中宮令楊府君諱暢字仲普墓道  
在四川嘉定州夾江縣

漢平陽府君神道殘字

右平陽府君叔神道七字平字上必曰某平其郡縣也  
叔之上下必尙有字其字也石缺不全不知爲何人洪  
氏云漢隸存于今鮮矣麒麟一毛虬龍片甲皆可貴

漢殘碑十三字

右殘碑四行第二行多一字字爲和弟故修德義休牧  
伯納康事以也辛酉之冬白下鄭谷口寄子札云故人  
王山史從華陰來麓中有東漢殘碑十三字高妙醇樸  
書體酷似酸棗令它碑不及也吉光片羽幸入補錄特  
摹寄上適山史游吾郡攜此札訪之出搨本相校不失  
毫髮谷口殆得漢隸之神者耶

漢蒙陰故縣庄碑

右碑在今山東蒙陰縣故縣庄九行二十一字漢隸之  
僅存者失其上下截矣戊午秋朱竹垞示所記世閒秦  
漢以來碑目有此碑云從邑志錄得又五年蕃久弟北



金石錄補卷第六  
游語之適留蒙陰修志以之屬令劉侯德芳拓本見寄  
且諭庄人龕置公解訪補殘缺使千餘年淪棄之物傳  
示天下不特見東蒙主人政事之暇樂善好古亦竹垞  
發于前蕃久求于後使予坐獲異寶庸非厚幸第蒙陰  
雖小置自西漢廢于建武至晉改入新泰復于至正所  
謂故縣庄者在縣東北必西漢初置之地惜碑文不成  
句無以考其事蹟却爲趙氏所遺不敢以泐之甚而不  
錄也蕃久又云蒙陰書堂社有摩崖古篆傳爲先秦時  
刻居民苦拓本酬應鑿以填橋然字有存者以水漲不  
能搨劉侯許續寄然則予錄之成其得同志仗助敢或  
忘之耶

金石錄補卷五

金石錄補卷第六

跋尾

槐廬叢書

崑山葉奕苞九來著

吳縣朱記榮校刊

漢李剛墓祠畫像

漢金恭墓闕畫像

漢伏尉公墓中石畫像

漢功曹史畫像

漢雍邱令畫像

漢成王周公畫像

漢孔子見老子畫像

漢董君闕畫像

漢路君闕畫像



漢王稚子闕畫像

漢范君闕畫像

漢鄧君闕畫像

漢魯峻墓祠畫像

漢李翁黽池五瑞畫像

漢柳孝廉敏碑陰畫像

漢雙排六玉碑畫像

漢單排六玉碑畫像

漢六物碑畫像

漢是邦雄傑碑陰畫像

漢左右生碑額畫像

漢廣漢屬國造橋碑額畫像

漢李剛墓祠畫像

右畫像所圖車馬之上橫列七字云君為荊州刺史時  
前後有騶騎步卒為導從其間標榜皆湮沒在後一車  
失其半榜存東郡二字向前一車榜存郡太守三字前  
後亦有騶騎步卒及榜而字不存矣又一車僅存馬足  
前六騎形狀結束胡人也上有榜存烏桓二字其一圖  
列女傳三事其一王人車一馬一凡三榜無鹽醜女齊  
宣王侍郎諸字其一四人三榜梁高行梁使者一榜無  
字其一四人樊姬楚莊王孫叔敖梁鄭女凡四榜後有  
一榜闕其人洪氏婁氏皆云像之殘闕多矣按水經云



鉅野有荊州刺史李剛墓墓旁祠堂石室三閒隱起雕刻君臣官屬龜龍麟鳳之文卽此畫像洪氏得之于閩人李丙仲南以爲絕無而僅有恐數十年後紙弊墨渝耽古之士撫卷太息亦猶今日之閱水經子感其意凡闕室畫象彙爲一卷皆從隸續碑圖中錄出蓋隸續二十一卷宋乾道戊子刻十卷于越淳熙丁酉姑蘇范至能刻四卷于蜀後二年雪川李秀叔刻五卷于越明年錫山尤延之刻二卷于江東其板始備景伯自跋尙云欲合數書爲一未能也況今日平先世藏書甚富僅得七卷聞長洲趙凡夫藏自八卷至末轉借十年不可得趙氏父子沒後此本歸吾家林宗又入錢氏述古堂子從毛氏汲古閣抄成全書然喪亂之餘趙氏本失第九第十兩卷而第十二十五廿一三卷尙多闕葉苟無好事者搜補鋟板不獨原碑久沒卽洪氏所葺名目圖像亦將湮廢豈不痛哉覽者勿謂予襲舊聞而誇爲新得也

漢處士金恭闕畫像

右闕圭首而銳刻一禽三足次題云處士金恭字子闕字存一筆以恭墓碑及金廣延母紀產碑叅之知其字子肅也次刻一人執扇乘馬兩旁龍虎銜環下則餽矣按闕門觀也劉熙釋名曰闕者門旁中央闕然爲道也又曰門闕天子號令賞罰之所出也長安志北闕顏師



古注未央殿雖南嚮上書奏事謁見之徒皆詣北闕未央東門又有東闕建章宮有鳳闕似非墓門神道之所宜名而漢人墓前率造雙闕刻銘畫像于其上按恭慕誌年廿二而卒弱冠不祿在六極之列既銘于碑復樹之闕漢人喜事誇張乃爾

漢伏尉公墓中石畫像

右畫像凡八石一石橫四尺高二尺有半兩巨人偶右有伏尉公三字左有右將軍韓侯子本七字坐後各一奴下有兩禽又一石七人分坐三席題其左曰高陵侯右曰曲闕侯兩螭橫其上三席之下舞劍者戲錢者脯鼎者使令之人凡二十人物字畫較前輩甚小又二立

石高五尺上有朱爵相向右禽之下一人長且三尺衣冠甚偉左右一牛首啣大環又一石有祭樓人坐其下一人前跪後有一器器上有物兩旁一禽四獸又二方石各二尺兩絃僅奴四輩其旁橫畫數路又一石長丈餘車四馬三人六洪氏云出資州內江縣土人謂之燕王墓未知何據凡漢碑書太字皆無下一點字書有伏字與大同音此伏尉卽大尉也按說文伏司也從人從犬徐鉉曰司今作伺風姓伏羲之後爲伏勝毛氏曰從人從犬與伏字不同伏從大音大海中地名洪說本此漢碑隸書減筆者爲省文以太爲泰轉以大爲太是也形聲同者爲假借以大爲太轉以伏爲大是也漢人好



奇故用之非洪氏該博不幾以伏尉公之伏爲姓乎漢志太尉公一人在太師太傅之次官名無尉公者知洪說爲可信

漢功曹史殘畫像

右畫像榜十八有字者五曰功曹史曰門下督曰下賊曹曰曹史曰督郵爲旁行者四第一行凡五車車中坐者一御者一次車後一人左執杖右執似扇之狀最後更有一人關第二行導者二人左吹管右關共三車最後又一車纔見其馬之半第三行凡兩車導者四人右持鐃左執管最後又一車則見其人之半面第四行一騎前行次二車前車一介在後最後又一車亦見其馬

之半車各一馬有益左方通下三行可見者二大車車後馬二奴隸六婁氏引朱希真云此像與雍邱令成王二像皆齊魯間漢公卿墓中物

漢雍邱令殘畫像

右畫像一榜五字泰山爲雍邱令所存者車八馬十有三最後一車石損車上之人十有六馬上之人四奔走于車馬之前者亦四人

漢成王周公畫像

右畫像二榜曰成王周公凡君臣侍御九一馬在後洪氏云政和中歷陽徐兢自濟陽代還所得漢世人物畫頗多則知充豫間冢中畫像不一自功曹史而下凡三



碑前一碑得之張安國叅考米氏畫史疑是朱浮墓壁者後二碑得之朱希真雖有車馬人物不可得而強名之也

漢孔子見老子畫像

右畫像榜四曰孔子車曰孔子也曰老子後一榜漫滅凡人物七車二馬三孔子面右贊雁老子面左曳曲竹杖中間又一雁一人俛首在雁下一物拄地狀若扇侍孔子者一人其後雙馬駕車一人坐車上馬首外向老子之後一馬駕車上亦一人回首向外太史公曰魯南宮敬叔言於魯君曰請與孔子適周魯君與之一乘車兩馬一監子俱適周蓋見老子云畫必据此一人俛首在雁下者必敬叔惜其榜湮矣禮記下大夫相見贊以雁孔子爲季氏史又爲司職吏爲司空蓋從大夫之後故其摯用雁也歟

漢董君闕畫像

右闕文云漢故不其令董君闕其畫像有一家冢上三物植立若木葉然香爐一二男子拜于前其後一婦人二稚子又有六婦人魚貫于後冢旁大樹一其下繫一馬馬後立一人樹左一婦人前有龜一若雞鶩者三洪氏婁氏引碑錄云濟州任城有童恢墓雙石闕字一云童恢琅邪人一云漢故不其令童君又引恢傳注云謝承書童作僮兩姓異同史氏所疑蓋未常見此闕遂以



董爲童與宗均相類當以碑爲正此洪氏直以恢之姓爲董非童猶均之姓爲宋非宗也婁氏字原載入上聲董字下又以董爲董子按說文無童董二字省僮爲童省董爲董漢交趾刺史僮尹鄭夾溱氏族略云卽童姓或從人以別其族而漢內史童仲又從童籀文作童故此闕上從山從童之形似草而監筆不下垂與董字異杜林曰藕根也爾雅曰藕稟董至董姓出隴西濟陰二望恐與僮童迥別其義亦非洪氏又引前漢地里志不其屬琅邪注其音基後漢郡國志東萊郡有不期國故屬琅邪者誤予按其之音基爲語辭詩夜如何其是也又作期詩云實惟何期箋云猶伊何也期音基則不期卽不其二齊記有不期山鄭元教授山下故以山爲邑名洪氏遽以爲誤何耶趙氏于此闕有目無跋子因畫像故與路君王稚子闕並補入焉

漢路君闕畫像

右路君二闕前闕七行二十一字書其所歷豫州刺史至徵試博士凡入官後闕亦七行二十一字書會稽東部官名及造闕年月日在趙錄中第趙以豫州爲後闕耳字畫兼用篆體前闕人物之後小字一行存馬皆食三字爲趙錄所遺也豫州闕前後各一人執杖負劍向字立後闕之前一人執杖負劍一人正面立腰下垂佩兩手各有所執末一人執杖負劍其前一人側面向字



立手中亦有所執蓋漢人爲二闕如王稚子之類分書  
官秩每屬國置都尉一人比二千石較州刺史六百石  
爲優然自建武六年省後不常置會稽邊海復置東西  
部路君必自刺史爲都尉故以後所歷者書于後闕且  
以秩之優者另書一闕歟會稽東部又見于衡方碑

漢王稚子闕畫像

右王稚子二闕與路君闕異路闕前後立此則左右並  
峙也各書官秩已見于趙錄而遺掾首額上洛陽先置  
稚子六字洛陽二字在左闕西面先置二字在右闕南  
面稚字在北面子字在南面先靈侍御等十六字則在  
西面也其石四周方數尺上琢樓屋爲蓋如寺觀中經

幢闕之兩角有斗斗上鑄耐童兒又作重屋四壁刻坐  
蓮之像四左右一小兒其像若今祠刹中所謂天王者  
獅象之間僧四乘馬者四人引車者二乘車者以繩曳  
獸者一中獸而立者亦一耐童兒二十七神體不具者  
三龍一象一師子八其六在五角獸面四半體者五子  
見嘉興曹侍郎所藏此二闕銘字今歸白下鄭谷口矣  
闕至今猶在成都惜無有椎拓之者

漢范君闕畫像

右闕存府君神道四字下人物五飛鳥一次橫一馬最  
下三方有白紋貫其中似嘗刻字上四人皆向右行又  
一石其人向左行疑卽范君之右闕碑錄云劍州梓潼



縣東有沛相劍門范皮墓闕字不多記姓名而已圖經  
縣東六里有范伯皮闕洪氏据蜀人云范君有二闕周  
回十六字多磨滅止存前四字又于闕旁獲甄堅厚如  
石其重十斤田夫時或得之上有小篆韻語每甄十行  
行一句其一甄云嗟痛明時仲治無年結僮孳孳履踐  
聖門知辨賜張闕噍孔言寬博闕約性能淵泉帶徒千  
人行無遺愆又一甄云德積未報曷九乾闕茂而不實  
顏氏暴顛非獨范子古今皆然想貌睹刑列畫諸先設  
往有知豈復恨焉闕上姓名雖漫漶而甄文有范子二  
字乃知范君名皮字仲治圖經伯字衍文也

漢鄧君闕畫像

右畫像三段一則兩褒衣講相見禮一奴偃而侍一則  
一馬駕車人坐蓋下有御有驂乘一騎先馳皆左向一  
則三馬駕車人坐蓋下有御者四人前導各有所執一  
騎殿皆右向蜀人相傳謂之鄧君墓

漢魯峻墓祠壁畫像

右畫像二石並廣三尺崇二尺其一下上三橫首行一  
榜云祠南郊從六駕出時次有六車帳下騎鮮明騎凡  
十六榜六車之上榜三字上兩字畧存左旁似是校  
尉騎字車前兩旁鮮明八騎步于中者四人一榜鈴下  
二字三十餘騎如魚鱗然列兩行橫車之後後有駙馬  
二字榜曰持駙馬又帳下一騎小史持幢四騎次橫一



人榜曰薦士生又奏曹主佐主簿車各一榜有車馬又  
騎史僕射二騎鈴下二騎各一榜第三橫冠劍接武十  
有五人一榜蓋闕里之先賢也字而不名其一上橫兩  
榜云君爲九江太守時車前導者八人後騎損其半少  
前一榜云功曹史導有車馬車前二騎其榜湮沒但刻  
雲氣下橫十有六人形象標榜與前石同疑亦先賢也  
又二石長過于前其一之上橫畫圖人物如武梁祠堂  
畫像主坐客拜侍前後者六人又主客三人列坐侍者  
四人中橫三車如雍邱令畫一車導騎二一車兩人在  
前一車一人在後屋下之人三又五賓主三車榜皆湮  
滅下橫十有七人如前聖門高弟人亦一榜而不可識

其一上橫七騎皆右馳中橫二車一有一導騎一則倍  
之末有五人在屋下二稚子在屋上下橫兩壇車皆駕  
以一馬一車有導騎二末有五人在屋下立車皆有榜  
惟四導騎上下各一字可認上曰君下曰郎水經注金  
鄉山司隸校尉魯君冢前石祠石廟四壁皆青石隱起  
自書契以來忠臣孝子烈婦孔子七十二弟子形象  
邊皆刻石記之按此四石存校尉九江及君郎等字蓋  
與魯峻碑中所署之官今惜闕失甚多所存孔門高弟  
姓名有與史記異同者洪氏詳加辨正如梁子魚之爲  
梁鱸叔魚縣子期之爲縣成子祺叔子其之爲叔仲會  
子期左子行之爲左人郢行又据地皇侯鉦七作乘韓



敕碑漆作凍而以求子歛之求字近來為漆雕哆子巽  
至云子匱為言游駟子關其為壤駟赤恐未必獨呼言  
子之名遺駟上之字且史記七十七子無子服景伯而  
此有子景伯唐劉懷玉作孔聖真宗錄以子服景伯在  
七十子之列與史記不符懷玉當必有據漢人去古未  
遠其傳述各有所自孔子之徒豈盡于史記之七十餘  
人也耶象中之庄疑子慮至子荀子二子關顏子思襄  
子魚襄子孺夾子高公子庄關不得謂非史記外之人  
若一一執史記以較其異同迂矣鮮明二字見米氏畫  
史朱浮墓石壁有鮮明隊若因二字而疑此象為朱墓  
中物者誤趙氏云曾有是畫象而失載故補之

漢李翁颺池五瑞畫像

右畫像龍鹿禾各一木二榜曰黃龍白鹿木連理嘉禾  
一人捧盤于喬木之下榜曰甘露降承露人左方題字  
二行君昔在颺池修峭嶽之道德治精通致黃龍白鹿  
之瑞故圖畫其像云云此李翁治西狹磨崖頌德之前  
所刻也

漢柳敏碑陰畫像

右畫像上一禽若鳳下則麟也其中牛首銜環兩旁凡  
六玉左則琮璋璜右為瑁圭璧在柳孝廉碑之陰趙氏  
止錄其碑云

漢雙排六玉碑畫像



右碑額之左狐九尾右鳥三足六玉分三行下有二驢一人跨其右最下承一大牛首蜀人謂之雙排六玉碑

漢單排六玉碑畫像

右碑上一朱鳥下元武四玉爲二行琮璧在下爲一行蜀人謂之單排六玉碑洪氏云馮緄墓道中有六物碑上二碑恐亦是馮墓中物

漢六物碑畫像

右碑與六玉同在今渠縣馮緄墓道中土人謂之六物碑上下朱爵元武其中未嘗鐫字非漫滅也

漢是邦雄桀碑陰畫像

右沒字碑是邦雄桀之陰也與六物碑同朱爵在其上

龜蛇在其下

漢左右生碑額畫像

右碑額無字穿上方格中立一朱鳥旁夾龍虎上有雙鳳作翔舞之狀刻畫精新爲左右生題名之碑在成都蓋左學右學諸生也歐陽公以爲漢洪氏以爲晉宋閒所刻因江夏寧蜀晉原遂寧四郡爲地里郡國兩志所無也考四郡乃蜀晉所置去東漢不遠重學校廣生徒字畫亦嚴整可愛而趙氏遺之故錄焉

漢廣漢屬國造橋碑額畫像

右碑額二人坐于上儼若賓主蓋辛李二君也中列一器如鼎各有使令一人在後辛字通達李字仲曾有碑



金石錄卷六

在目中

光緒歲在丁亥仲春之月  
吳縣朱記榮槐廬家塾校刊  
金石錄補卷六

